



**PARTORDING NI PARMINGGUON
MINGGU V DUNG TRINITATIS
(JUBILEUM 125 TAON ZENDING HKBP)**



📖 Ev : 2 Korint. 3 : 2 – 6 📖 Ep: Markus 16 : 14 - 18

**TOPIK :
HAMU DO SURAT NI KRISTUS**



**Oikumene
Inklusif**
*Orientasi Pelayanan
HKBP 2024. **Mat 5:45***

**HURIA KRISTEN BATAK PROTESTAN
MINGGU, 30 JUNI 2024**

JOUJOU TU PARMINGGUON

Liturgis :Huria na hinaholongan ni Kristus! Selamat ari Minggu ma di hita saluhutna! Nunga sahat hita tu Pesta Puncak Jubileum 125 Taon Zending HKBP na mar-tema-hon “*Hamu do Surat ni Kristus*”. Tabongoti ma parmingguonta sadari on huhut mar-ningot jala manghamauliatehon pandonganion ni Debata na so marpansohotan di pardalanan ni uloa Zending di HKBP naung dipungka sian taon 1899. Tapahusorhusor ma di bagasan rohanta be huhut tahangoluhon paboa “Surat ni Kris-tus” do hita, na ingkon mamboan Barita na Uli tu sandok na tinompa. Antong, tapungka ma masuk, **marende ma hita!**

1. MARENDE BE No. 565 : 1 - 3 “Las rohangku lao mamuji”

- ❖ Las rohangku lao mamuji, Debata Parholong i
Songon bunga na mangerbang, di na binsar ari i
Arsak, dosa, haporsuhon, mago dibaen asiMi
Las ni roha na manongtong, lehon di au Tuhanki.
- ❖ Sude jadijadianMu, laut, tano, langit i
Angka bintang dohot bulan, nang mata ni ari i
Hauma, ladang, nang harangan, rura dohot dolok i
Saluhut na mangendehon, sangap di Tuhanta i.
--- *interlude/iringan musik* ---
----- *Jongjong* -----
- ❖ Debata Parholong roha, na manesa dosangki
Ndang tarbaen so las rohangku, lao mamuji asiMi
Sai ajari sude hami, manguilahon holong i
Asa gok las rohanami, dibagasan Tuhan i.

2. VOTUM - INTROITUS -TANGIANG

Liturgis :Marhitehite Goar ni Debata Ama dohot Goar ni Anak-Na,
Tuhan Jesus Kristus dohot Goar ni Tondi Parbadia, na tumompa
langit dohot tano on. Amen.

Lehetna i di atas ni angka dolok angka pat ni parbarita na uli, na patubegehon hadameon, na mamaritahon Barita na Uli, na patubegehon hatuaon, na mandok tu Sion: “Debatam do bangkit Raja”. Haleluya!

Huria : (Mangendehon): BE. HKBP No. 852 : 1 ”HALELUYA HKBP (3X)” BL. 852

♪♪♪Haleluya... Haleluya... Haleluya.

Liturgis :Martangiang ma hita!

Ale Tuhan Jesus Kristus, Ho do na manobus portibi on marhite mudar-Mu na badia i. Dijou Ho do torop halak asa pasidohot mamaritahon haluaon na pinatupa-Mi di hami. Asi ma rohaM, lehon ma hiras ni roha di hami laho marBarita na Uli. Sai ajari ma hami manghasurunghon parsuruon-Mi sian angka ondeng di portibi on. Urupi ma hami, asa sai tongtong rade mangalehon nasa gogonami tu hararat ni harajaon-Mi. Amen.

--- hundul ruas ---

3. MARENDE BE No. 118 : 1 + 4 “Paian ma di hami” BL. 6

- ❖ Paian ma di hami, O Jesus asiMi.
Asa tung unang hami diansi musu i.
- ❖ Paian ma di hami tongtong panumpakMi.
Gandahon ma di hami asi ni rohaMi.

4. PATIK (2 Timoteus 4:2)

Liturgis :Tangihon hamu ma Patik ni Debata na tarsurat di **Buku 2 Timoteus Bindu 4 Ayat 2**, *Jamitahon hata i, hajongjonghon di tingki na une nang so une; pinsang, paingot, apoi marhitehite nasa lambas ni roha dohot pamodaion.*

I do sahatna. Antong rap mangido gogo ma hita sian Tuhan Debata laho mangulahon na hombar tu patikNa i!

Huria :Ale Tuhan Debata, sai pargogoi ma hami mangulahon na hombar tu patikMi. Amen.

5. MARENDE BE No. 516 : 1 - 2 “Bege joujou ni Jesus” BL. 353

- ❖ Bege joujou ni Jesus i, tongtong dijou na lilu i
Mago do birubiru i sian Tuhanta Jesus i
Sai lului, sai lului birubiru na mago i
Sai lului, sai lului, mulak boan i tu Jesus.

--- jongjong ruas ---

- ❖ Ho diarahon Jesus i, silu lului na mago i
Togihon ma tu Jesus i na loja, na maheu i
Sai lului, sai lului birubiru na mago i.
Sai lului, sai lului, mulak boan i tu Jesus.

6. TANGIANG MANOPOTI DOSA - BAGABAGA

Liturgis : Tatopot ma sandok dosanta! **Martangiang ma hita!**

Ale Jahowa Debata, Amanami Parasiroha na sumurung.
Dilehon Ho do sondangMi patiurhon dalannami tu hangoluan.
Jala dihalomohon rohaM do asa tung sandok namarhosa mian
di bagasan sondang hatiuron na sian Ho. Na ro do hami nuaeng
tu adopanMu, manopoti dosanami, jumotjotan do hami mauhom
di bagasan haholomonami. Ndang huungkap hami pingkiran
nang rohanami manjanghon sondang hatiuron na sian Ho.

Huria :Ale Tuhan, asi ma rohaM di hami halak pardosa on. Asi ma rohaM!

Liturgis :Ditogutogu Ho do hami marhite ragam ni pangajarionMu.
Dipanghulingi Ho do hami marhite HataM na tarsurat di buku
nabadia i, nang marhite pangajarion dohot jamita na pinasahat
ni angka naposoM. Alai jotjot do paula so hutangihon hami
angka pangajarion nang jamita i. Hurang do ringgasnami
mangguruhon jala pahusorhusor HataMi di ngolunami na
mambahen hami sai mian di haholomon.

Huria :Ale Tuhan, asi ma rohaM di hami halak pardosa on. Asi ma rohaM!

Liturgis :Disuru Ho do ganup halak naung manjalo sondangMi gabe
sitindangiM laho mamaritahon Barita na Uli tu sandok na
tinompa. Alai jotjot do hulaosi hami parsuruonMi, nda ingkon
marsinondang ma nian ngolunami tanda ni naung hujalo jala
huhangoluhon hami sondangMi? Hurajumi jala hutopoti hami

do ndang sian nasa gogo hami papatarhon sondangMi marhite pangalahonami siganup ari.

Huria :Ale Tuhan, asi ma rohaM di hami halak pardosa on. Asi ma rohaM!

Liturgis :Dihalomohon rohaM do asa lam martamba angka halak na porsea jala na pinalua ni holongMi. Ala ni i, disuru Ho do sandok huriaM di portibi on patupahon ragam ni ulaon marbarita na uli asa lam torop angka na porsea. Asi ma rohaM di huriaM jala marpamuati ma rohaM di hami ala jotjot hulaosi hami parsuruonMi. Palambas ma rohaM mida hagaleon ni huriaMi molo sipata gumodangan hulehon hami roha nang pingkirannami paradehon angka ulaon *seremonial* saming, hape lupa hami di angka dongan namanghasiholi sinondangMi dohot namanghalungunhon pangurupion.

Huria :Ale Tuhan, asi ma rohaM di hami halak pardosa on. Asi ma rohaM! Amen.

Liturgis :Tangihon hamu ma bagabaga ni Debata taringot tu hasesaan ni dosanta!

Songon sintongna mangolu Ahu, ninna Tuhan Jahowa, tung na so lomo do rohangKu mida hamatean ni halak parjahat i, so ingkon mida hamumulak ni parjahat i tumadingkon dalanna i nian, asa mangolu ibana.

Hasangapon ma di Debata na di ginjang!

Huria : Amen.

---*hundul ruas* ---

7. MARENDE BE No. 730 : 1 – 2 “Sai patau ma au Tuhan”

- ❖ Sai patau ma diringku ale Tuhan, papatarhon hinauliMi Tuhan Suru ma TondiMi saor tu rohangki, lao papatar holongMu tu donganhi.
- ❖ Sai patau ma diringku ale Tuhan, papatarhon hinauliMi Tuhan Suru ma TondiMi saor tu rohangki patariparhon basaM tu donganhi.

8. EPISTEL (Markus 16 : 14 - 18)

Liturgis : Tangihon hamu ma Hata ni Debata turpuk di ari Minggu sadari on, i ma na tarsurat di Evangelium ni si **Markus Bindu 16 Ayat 14 - 18:**

Dung i muse uju hundul nasida mangan, dipataridahon ma diriNa tu sampulu sada i, dipinsang ma ganggu dohot jogal ni rohanasida, ala so porsea nasida di angka naung marnida Ibana, naung hehe sian na mate.

Huria :Jadi ninna ma mandok nasida: “Laho ma hamu tu liat portibi on; jamitahon hamu ma Barita na Uli i tu nasa na tinompa.

Liturgis :Na porsea jala tardidi, dapotan haluaon; alai na so porsea i, hona uhum do.”

Huria :Jala on ma tanda angka na mangihut tu na porsea: Pabalionnasida do angka sibolis marhitehite goarHu dohot manghatahon hata na imbaru.

Liturgis :Jomputonnasida do angka ulok, jala nang diinum rasun hamatean ndang pola mahua nasida; ampehononnasida ma tanganna tu angka na marsahit, gabe malum ma hilalaonna.
I do sahatna. Martua do angka na tumangihon hata ni Debata jala na umpeopsa. Amen.

9. MARENDE HURIA BE No. 658:1-2 “Tu portibi on na rundut”

- ❖ Tu portibi on na rundut borhat ma ho
Galak bahen palitomu sai dungo ho
Boan sondang tu na holom mangurupi na mardangol
I do Barita na Uli ni Kristus i.

--- jongjong ruas ---

- ❖ Taradoti hasadaon ni ruas i
Talului birubiru na mago i
Hata ni Tuhan Jahowa do pasada houm nang hata
Sian sude partingkian tu Debata.

10. MANGHATINDANGHON HAPORSEAON

Liturgis : Tahatindanghon ma haporseaonta i, songon na hinatindanghon
ni donganta di sandok portibi on, rap ma hita mandok!

Huria :Ahu Porsea...d.u.

--- *hundul ruas* ---

11. KOOR : Mars Jubileum 125 Tahun Zending HKBP

12. TINGTING

13. KOOR :

14. PELEAN I A-B HUHUT MARENDE HURIA BE No. 518 : 1---

“Marsinondang dibaen Jesus” BL. 355

- ❖ Marsinondang dibaen Jesus asi ni rohaNa i
Jala hita do disuru, asa ta paboa i
Tapagalak palitonta, tapatiur dalam i
Ai torop dope na lilu, sai hatop ma mulak i.
- ❖ Nang au on na dao najolo, di na holom lilu au
Alai sondang ni Tuhanhu do mamboan mulak au
Tapagalak palitonta, tapatiur dalam i
Ai torop dope na lilu, sai hatop ma mulak i.
----- *interlude/ iringan musik* -----
- ❖ Haholomon manghuphupi toropan di tano i
Tung torop manghalungunhon, sondang tu dalanna i
Tapagalak palitonta, tapatiur dalam i
Ai torop dope na lilu, sai hatop ma mulak i.
- ❖ Dongan, so tung mintop lampu na ringkot tu dongan i
So tung mago angka jolma dibaen halembaonmi
Tapagalak palitonta, tapatiur dalam i
Ai torop dope na lilu, sai hatop ma mulak i.

15. JAMITA (2 Korintus 3 : 2 - 6)

16. PELEAN II HUHUT MARENDE HURIA BE No. 666 : 1---

“Ingkon do boanonta barita”

- ❖ Ingkon do boanonta barita, tu inganan na holom i
I ma holong nang hasintongan dame na manongtong i
Dame na manongtong i
Ai naung binsar do hatiuron, nunga salpu na holom i
Huaso ni Kristus hot tongtong saleleng-lelengna i.
- ❖ Ingkon endehononta pujian, pasangaphon Tuhanta i
Na tuk manaluhon na jahat, nang sinjata porang i
Nang sinjata porang i.
Ai naung binsar do hatiuron, nunga salpu na holom i
Huaso ni Kristus hot tongtong saleleng-lelengna i.
----- *interlude/ iringan musik* -----
- ❖ Ingkon do boanonta Barita, Debatanta do Raja i
Dilehon anak sasadaNa, manobus pardosa i
Manobus pardosa i
Ai naung binsar do hatiuron, nunga salpu na holom i
Huaso ni Kristus hot tongtong saleleng-lelengna i.
- ❖ Ingkon do hita manghatindanghon Jesus Kristus Partobus i
Asa tu toropna na olo, manjanghon na sintong i
Manjanghon na sintong i
Ai naung binsar do hatiuron, nunga salpu na holom i
Huaso ni Kristus hot tongtong saleleng-lelengna i.

17. PARSURUON (Jongjong)

Parjamita :Huria hinaholongan ni Kristus! Janghon ma sondang sian
Tuhan i na manondangi sandok dalanmu. Mardalan ma ho
raphon Tuhan Jesus asa unang lilu ho alai tiur ma angka
dalanmu. Jaloonmu ma nang hatuaon dohot dame marhite
Tondi Parbadia.

Huria :Amen. Sai pargogoi ma hami, ale Tuhan!

Parjamita :Loas ma digohi holong ni Tuhanta i roham! Asa lam
mananda ho di angka pambahenan ni Debata patupahon
haluaon tu nasa na tinompa. Sai dipargogoi ma ho
marsitutu pararathon barita haluaon i.

Huria :Amen. Sai pargogoi ma hami, ale Tuhan!

Parjamita :Patinggil ma sipareonmu, roha nang pingkiranmu
manangihon parsuruonNa di tongatonga ni ulaonmu na
marragam i. Sai TondiNa i ma mangalehon hiras ni roha
di ho gabe parBarita na Uli.

Huria : (Mangendehon) BE No. 218 : 4-5 “Tong do tau haposan”

- ❖ *Ale Tuhannami sai sondangi ma, sude dongannami na di Sumat’ra
Dohot halak Nias, halak Borneo, asa tung lam ias lao managam Ho
Dohot halak Nias, halak Borneo, asa tung lam ias Lao managam
Ho*
- ❖ *Nang pe angka jolma na di Afrika, ro di halak Sina dohot Asia
O Jesus Panondang sai sondangi ma asa ro marsomba tu Ho,
Debata
O Jesus Panondang sai sondangi ma asa ro marsomba tu Ho,
Debata.*

18. TANGIANG PELEAN

P : Tatangiangkon ma peleanta!

Ale Debata, Amanami na di banua ginjaang, Ho do haroroan ni
saluhut silehonlehon na denggan dohot nasa ulibasa na
mauliutus. Hupasahat hami ma sian na nilehonMi tu hami,
peleannami tu Ho. Sai jalo ma i gabe uap na hushus di joloM.
Pasupasu ma i jala ramoti asa huparhaseang hami pelean on,
patimbulhon harajaonMu di tongatonga ni huriaM dohot di
portibi on. Buhai ma rohanami marhitehite TondiM, asa lam
hutanda hami godang ni silehonlehonMi tu hami, asa lam girgir
hami mandok mauiate tu Ho, marhitehite Jesus Kristus
Tuhannami. Amen.

**H : (Mangendehon)BE. HKBP No. 204 : 2 “NDANG
TADINGHONONHU HO” BL 73**

*♪♪♪ Nasa na nilehonMi, tondi ro di pamatanghu
Hosa dohot gogongki, ro di saluhut artangku
Hupasahat i tu Ho, na so unsatonhu do.*

19. TANGIANG DI PESTA ZENDING

Ale Tuhan Jesus Kristus, Tuhannami jala Debatanami! Hamuliaon
dohot pujipujian ma di Ho ro di saleleng ni lelengna. Nunga ditaon

Ho na porsuk, use mudarMu humophop hami pardosa, asa tu hangoluan hami. Disuru Ho do siseanMu mamaritahon Barita na Uli tu portibi on. Ala ni i do umbahen las rohanami nuaeng, ai nunga sahat tu hami Barita i, gabe jumolo hami jumpangan martimbanghon angka bangso na asing. Sai lehon ma Tondi Parbadia tu hami, asa mangoloi hami di ajar dohot poda na sian HataMi. Sai tambai haporseaonnam i jala longkangi rohanami sian portibi on, asa jolma na badia jala na imbaru hami. Diparbaga Ho do oloanMu pangidoannami. Asi ma rohaM dohot di angka na so tumanda Ho dohot halak parugamo na asing angka na hundul di haholomon i. Sai dasdas nasida ro asa dohot nasida marpungu di HuriaMi. Sungguli ma roha ni halak Kristen, suru ma nasida mamaritahon Barita na Uli i, asa tau sira dohot palito nasida di portibi on. Sai ramoti ma HuriaM jala parsahalai angka ParhaladoM laho mamaritahon HataMi dohot patulushon sangkapMu. Sai suru ma angka pangula na burju tu sigotilon na lambas i, asa dipapungu nasida na tau tu harajaonMu. Sai ramoti jala pasupasu ma angka naposoM, na pararathon harajaonMu, di tongatonga ni na so tumanda Ho dohot parugamo na asing, lehon tu nasida gogo, benget ni roha, haporseaon dohot pamompomon ni roha, asa pir tondina manaonnaon, paimahon angka na olo pangoluon. Sai lehon apulapul tu angka pangula naung loja, apusi ma iluilu sian matana, sai marparbue bahen ulaonnasida, asa marolopolop nasida mamuji Ho. Sai ramoti ma angka Huria, naung pinapunguM i, indukna ro di ruasna. Padao sian nasida pangaleleon manang pangarupaon ni parjahat. Sai unang loas tarambat hararat ni Barita na Uli i; sai pademak ma angka musuna. Sai arahon ma halak na di sandok tano on, asa ria nasida ro tu HuriaM, sian utara ro di dangsina, sian habinsaran ro di hasundutan, asa domu hami sada Huria na badia, na marhatopothon: Tuhan Jesus Kristus, i do Raja dohot Tuhan, bahen hasangapon ni Debata Ama saleleng ni lelengna. Amen.

Ale Amanami na di banua ginjang! Sai pinarbadia ma goarMu! Sai ro ma harajaonMu! Sai saut ma lomo ni rohaM di banua tonga on songon na di banua ginjang! Lehon ma tu hami sadari on hangoluan siapari! Sesa ma dosanami songon panesanami di dosa ni dongan na mardosa

tu hami! Unang hami togihon tu pangunjunan! Palua ma hami sian pangago!

H : (Mangendehon): BE HKBP No. 841 : 1 “AI HO DO NAMPUNA HARAJAON” BL 841

♪♪♪ Ai Ho do nampuna harajaon, dohot hagagoon
Ro di hasangapon, saleleng ni lelengna, Amen.

P : Tangiang Pasupasu

H : (Mangendehon) BE No. 845 : 1 “AMEN, AMEN, AMEN” BL 845

Amen, Amen, Amen